

09.11.2020

UKA2020/35

Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut pisortanit ikiorsiissutit pillugit allannguuteqaqqullugit, taamaalilluni namminerisamik illuutillit aammalu inissianik piginneqatigiillutik pigisallit pisinnaatitaaffigilissagaat pisortanit ikiorsiissutinik ikiorneqarsinnaanngortillugit, kræfteqarlutik nappaateqarnertik ilutingalugu katsorsagassanngoraangamik naliginarmik akissarsionertik unikkallaraangat sulisinnaajunnarnertik pissutingalugu. Nalunaarusiami erseqqissarneqassaaq ajornartorsiut qanoq isikkoqarnersoq aammalu qanoq ikiortarialiunersut taamatut pisinnaatitaaffilissappata. Nalunaarusiaq UKA2021-mi saqqummiunneqassaaq. (Inatsisaertunut ilaasortaq, Erik Jensen, Siumut)

Inatsisartut aalajangiiffigisassaattut siunnersuut siunnersuuteqartumut Erik Jensen-imut qujalluta Siumumiik ima ittumik oqaaseqaateqassuugut.

Nappaatip suulluunniit inuunerput ullormiit ullormut allarluinnanngortissinnaavaa, minnerunngitsumik ilaqutariittut inuuneq, nappaat kræft nunatsinni inuiaqatigiinnguanut nanertuutaavoq ilungersunartorujussuaq, minnerunngitsumik naliginnaasumik inuussutissarsiorsinnaajunnaarallarneq tikinneqaraangat nanertuutit annertunerpaat ilangisarpaat ineqarnermut illoqarnermullu akilersuisinnaajunnaartoqartillugu.

Nappaassuaq taanna akiorniarlugu qujanartumik suliut suliniutillu nunatsinni annertoorujussuupput, ikioqatigiissinnaassuserpullu aamma tulluusimaarutissaavoq, siunnersuuteqartullu tikkuangaa ineqarnermut tunngasoq suli naleqqussaavigisimangilarput, taannalu suliassaq maani issittumi nunarsuup avannarpiarsuani najungaqassagaanni pinngittoorneqarsinnaanngittoq Siumumit isumaqarpugut.

Nunatsinni ukiut tamaasa inuit 200 kræftimik nappaateqalersarsimappata agguaqatigiisillugu sapaatip akunneranut inuit pingasut sisamaasarsimassapput, amerlassutsitsinnullu sanilliukkaanni kisitsit annikigisassaangilaq, taamaammat pissusissamisoorpoq ajornartorsiutaalersartog taanna ineqarnermut tunngasoq tamakkiisumik qulaajaaffigissallugu aamma suliassaq nukiginnarpoq.

Taamaattumik Siumumiik allannguutissatut siunnersuuteqassuugut ima ittumik:

Sanaqatigiilluni aamma illulioqatigiilluni illuutillit, piginneqatigiilluni illuutillit kiisalu namminerisaminnik illuutillit tassangaannartumik nappaassuarmik eqqungaasimasut, angerlarsimaffimminnut akilersuutiminnik ikiorserneqarsinnaanerannik periarfissaqalersinnaangorlugit pisortanit ikiorsiissutit pillugit Inatsisartut peqqussutaata nr. 15, 20. November 2006-imeersup allangortinneqarnissaanik UKA 2021-imut Naalakkersuisut peqquneqarnissaannik Inatsisartut aalajangiiffigisassaattut siunnersuut.

Taamaalilluni anguneqarniassammat nalunaarusioqqaanngikkaluarluni piaartumik ajornartorsiutip aaqqiiviginissaa.

Taamatut allannguutissamik siunnersuuteqarluta siunnersuut ataatsimiititaliamut susasaqartumut innersuullutigu sulilluarnissaannik kissaappavut.

Nikkulaat Jeremiassen, Siumut.

